

經文：以西結書 37:1-14

今 á 日爲聖神降臨節（五旬節），咱改革宗一向 lóng 互認爲無 jōa 注重聖神 ê 教派。其實教會基本上是受聖神之洗 ê 基督身軀（林前 12:13），透過 tī 聖神裡 ê 敬拜（弗 2:18；腓 3:3；來 12:22），hō 基督復活 ê 生命 ē-tàng 落實。聖神對每 ê 信徒，按著家己 ê 意思，kā 無仝 ê 恩賜分 hō in, tang 裝備 in, 來成就委託 in ê 責任（徒 13:1-2；提後 1:6-7；另參提前 4:14），並且 hō 每 ê 信徒盡本分，彼此建立，ho 身軀 ē-tàng 成做基督 ê 款式（弗 4:11-16）。聖公會、長老會 kap 公理宗等主流教派 ê 教制，全是爲 tiòh 會成就這 ê 原則來制訂 ê。靈恩派也重視這 ê 教義，只是 in 特別強調使徒時代 ê 某一 kóa 恩賜，譬如講：講方言、行神蹟、醫病，kap 帶有新信息 ê 預言。這欸強調法有伊危險 ê 一面，雖然上帝要更新 chiah-ê 恩賜也 m̄ 是不可能。tùi 第一個五旬節聖神降臨了後，教會就大大興旺；每 pái 教會行到沒元氣 ê 時，上帝就灌落伊 ê 聖神，hō 教會帶來新 ê 活力。

主後二世紀，教會吸收希臘哲學，急 tī 向世界證明基督教教義 ê 包容性，結果希臘哲學 ê 理念駕馭了當時 ê 護教士，教會變 kah lóng 無生命力。Chit 時 chūn 有人開始找尋上帝 ê 面，上帝應允 in ê 祈禱，就有孟伊努派（Montanists）ê 出現，in 堅信聖神猶原親像起初仝欸 tī 教會中積極做工，顯明伊 ê 全能。Chit-ê 派後來雖然行向極端 ê 靈恩，總是教會確實又恢復活力，教會史上 siōng 卓越 ê 護教士之一特士良（Tertuliaian, 約 160—225，奧古斯丁 chin 前 siōng 重要 ê 神學家）面對當時教會死酸 ê 形式主義，看 tiòh 聖靈 tī 孟伊努運動中 ê 彰明，mà 加入了孟伊努派。十七世紀馬丁·路德 kap 約翰·加爾文領導 ê 宗教改革，這 mà 是一場大 ê 復興。十八世紀美國 ê 大覺醒運動。Chiah-ê 復興運動（Revival）說明每 pái 人 na 找求聖神 ê 大能，上帝就會灌落伊 ê 聖神，hō 信徒經歷新生 ê 大能（路 11:13）。所以聖神降臨節 ê 意義就是：上帝 bat kā 伊 ê 聖神澆灌落來，伊 beh 繼續用聖神充滿伊 ê 教會。耶穌基督 tī 馬太 28 章所賞賜 ê 大使命，是賜 hō 代表教會 ê 使徒，然後透過 in 來落實 tī 每一個信徒 ê 身上。

今 á 日所讀 ê 以西結 37 章是舊約聖經中 siōng 有名 ê 有關聖神 ê 記載。主要是說上帝對猶太人並 m̄ 是永遠 ê 棄絕，上帝對亞伯拉罕 ê 應允，伊 beh 親自牧養以色列人民（34:11-16），伊 beh 將聖神 khng tī in 裡面，Tang 互 in ē-tàng 遵行上帝旨意，hō in 成做新 ê 子民。平原上 ê 枯骨（v.2）代表上帝 ê 子民雖然失去了 òng 望，上帝 ai 以西結向 in 宣告一個好消息，以色列 kap 猶大必合作一國，百姓 beh 得救，親像枯骨復生仝欸，最後伊 ê 百姓 beh 看見聖殿榮耀 ê 光景，透過 in, 列國會尊趁伊 ê 聖名（40:23）。Chiah-ê 應允 tú 好 kā 新舊約串連起來。道成肉體 ê 耶穌，kā 聖神賞賜 hō 凡信靠伊 ê 人，正是應驗以西結所預言 ê。每 pái 上帝 beh 以西結講預言 ê 時，lóng 以「聽見上主向我講話」（1:3、3:14 kap 22、8:1、40:1）開始。Chit 段經文又分做兩個段落：第一段是枯骨 ê 景況，第二段則是枯骨復活。

枯乾 ê 骨頭 先知所見 tiòh ê 異象是一種無救 ê 困境。以西結所講 chiah-ê 骸骨就是以色列全家，上帝 ê 選民！hit 時 in m̄-nā tī 政治上遇到國破家亡，親像骸骨仝欸屍橫遍野，tī 靈性上 ma 親像枯乾 ê 骨頭，違背上帝，離開上帝遠遠。上帝問以西結講：chiah-ê 骨頭 ē-tàng

koh 活過來 mah?(v.3)爲什麼上帝要 án-ne 問以西結？ hit 時 ê 以色列人對上帝 kap 對家己 ê 人生也已經失去了 òng 望。In m̄相信有復興 ê 日子，所以 in án-ne 講：「以色列人 tú 親像 chiah-ê 屍體。In 認爲家己非常枯乾，無希望，無前途。」〔v.11〕想像看嘍，咱若 tī 靈性低潮 ê 時，看 bē-tiòh òng 望，看 bē-tiòh 未來，上帝突然間問你：「你 ē-tàng 復興 mah?」你會按怎回答？干會親像以西結信心滿懷回答講：「至高 ê 上主 ah, 只有你 chiah 知影！」〔v.3〕以西結知影上帝有一切 ê 答案，只要伊願意，枯乾 ê 骨頭也會 thang 復生。你對上帝干有 chit 款 ê 信心 mah?

枯骨復活 上帝 hō 以西結看 tiòh ê，是一個國家滅亡 ê 景象。上帝 ê 選民完全無 òng 望。以西結 m̄ 知 chiah-ê 枯骨 kám 會活過來，因爲國家無 ah, 什麼 lóng 無 ah! 上帝向以西結發預言，上帝 ê 靈將要運作！上帝吩咐以西結對骨頭講：「beh 聽耶 kap 華 ê 話」(v.4)。以色列民不聽耶和華 ê 話才會成作骨頭，今 mà 只有悔改，返轉來聽耶和華 ê 話，chiah ē-tàng 踏上復興 ê 頭一步。當以西結向骨頭講上帝 ê 話了後，In 開始有奇妙 ê 變化，以西結看 tiòh 枯骨生筋、生肉、生皮，最後成做一個有活氣 ê 人，koh-khah 成做一個極大 ê 軍隊。當時 ê 人看 tiòh 枯骨復活 ê 記載，可能無清楚異象 ê 意義，今 á 日咱卻真清楚明白上帝 ê 旨意：伊 hō 以西結看 tiòh ê 異象，一定會實現。以色列 ti 亡國二千外年了後，1947 年 tī 原來 ê 所在復國，成做獨立 ê 國家。枯乾 ê 骨頭果然結合成作一個極強大 ê 軍隊，雖然三面攏 ho 阿拉伯國家圍起來，西邊是地中海，伊猶原不倒。基督教 ê 擴展 kám m̄ 是 án-ne mah? 教會 tui 五旬節開始，成做一 ê 大軍隊，成做基督精兵，kā 福音傳到全世界。

今 á 日 ê 教會需要聖神 e 顯明，咱有 tui 上帝來 ê 確信，thang tī 一個異端 kap 邪教充滿 ê 社會中，爲真理 phah 美好 ê 仗。咱要確信有復興 ê 可能！聖經 kap 教會 ê 歷史 lóng 向咱見證，咱所信靠 ê 上帝是創造萬物 ê 上帝，tī 伊無難成 ê 事。1986 年諾貝爾和平獎得主也是集中營生還者 Elie Wiesel bat 講：以西結枯骨復活景象是無時間性 ê，因爲每個世代 lóng 需要聽 in 家己世代枯骨復活 ê 事蹟。對一個集中營生還者來講，in 是經歷枯骨復活 ê 事實。反倒轉來看台灣現在 ê 現象，有人悲觀地認爲台灣 ê 本土化 chia 萌芽，本土政權 chiah 確立。但是泛藍集團一心 beh 折斷 chia tú tú 生出來 ê 民主幼苗，台灣早晚會 hong 出賣。羅榮光牧師頂禮拜拍電話來講：in 想 beh 演出木馬屠城記。設使上帝 ē-tàng hō 亡國兩千六百外年 ê 以色列又復國，咱 mà ài 相信上帝有伊 ê 旨意，而且一切 lóng tī 伊 ê 手中！咱 beh 爲台灣守望祈禱，透過信心 ê 目調，心存 òng 望，òng 望有 koh-khah chē ê 台灣人 ē-tàng 信靠上帝，遵趁伊 ê 教示，有一上帝必 hō 台灣枯骨復活！hō 咱心疼 ê 台灣 ē-tàng 邁向更卡好 ê 明 á 載。

枯骨復活 ê 異象，帶 hō 咱 ê 是 òng 望 ê 信息。上帝講，伊行這 ê 事 m̄ 是爲 tiòh 百姓，卻是爲 tiòh 伊 ê 聖名 (36:22)。上帝 beh 復興伊 ê 百姓，這 hō 咱 koh-khah 肯定上帝所計劃 ê 必成。只要咱照上帝 ê 話去生活，傳道者 ái 有責任 kap 上帝同工，靠聖神牧養伊 ê 羊群。聽道 ê 人 ái 有責任去回應上帝 ê 呼召。上帝 ê 目的是 beh hō 全世界 lóng 認識伊 (36:23)。òng 望咱盡家己 ê 責任，hō 聖神更新咱 ê 靈命 kap 咱 ê 教會；藉 tiòh 聖神 hō 上帝 ê 子兒合一成做極大 ê 軍隊，爲耶穌 ê koh 來鋪路，迎接主 ê 再臨！